



名家表選卷之四

謝中書舍人表

曾子固

甫上程篇遽塵寵任載惟遭遇陪集兢慙中謝蓋聖君難諭之情將欲施於號令得當世能言之士然後達於文辭矧今網理四方彌綸庶政肇惟新之玉度備文簡之官儀計謀常越於拘擥注錯舉爲於希闊豈伊凡庶可測高深方當覺悟邇使徧知於上意訓齊內外用不變於群心尤資演暢之材盡曲丁寧之旨布爲邦典茲謂人文顧在臣愚豈堪此選伏况 皇帝陛下超逾千載特起一時躬堯帝之聰明而不忘講學集成湯之勇智而無勅咨詢惟左右前後之臣有耳目腹心之寄尤非淺識所可叨居如

臣性寔滯蒙器非廣博知自強於名節耻陰附於貴權無
因緣毫髮之扳援有積累丘山之忌嫉晚逢睿聖獨賜收
憐褒加特異於常倫進用每從於中出猥以五朝之大典
屬於一介之孤生已愧缺然將安稱此敢期誤寵仍冀近
班敷導訓辭懼空疎之難強追參諷議憂蹇淺之易窮於
風波流落之餘以蒲柳衰殘之質自循涯分曷副恩榮雖
日月之光何加於潤色而天地之德無待於論思然臣素
堅好古之誠粗識愛君之義既抗顏而就列敢恕已以懷
私謹當尋繹舊聞用闡揚於名命激昂懦志庶補助於謀
猷仰答主知誓殫臣節

齊州謝到任表

曾子固

顧以諸生備茲煩使據非其所懼不克堪中謝伏念臣素
乏他長偶知好學議先王之制作嘗究本原論夫子之文
章頗探閫奧歷事聖君於三世與游儒館者十年不知苟
曲以取容但信朴愚而自守比緣私計請貳外藩嗟疾病
之餘生困米鹽之細務方指期於滿歲將垂翼於故棲遽
此外遷處之劇郡維般陽之列壤寔季前之遺區習詐而
夸著流風於在昔多盜與訟號難治於當今比試用於此
邦必資求於強吏蓋因能而任官者不違其分則量力而
受位者得竭其材豈伊懦懦之資可副浩繁之用恐殫精
思無補毫分然而繇積累以冒恩寔養成之有自此蓋伏
遇 皇帝陛下智周萬物明照四方在踈遠迂賤之中而

察其所守無左右遊談之助而知其所長故令覆露之仁
及此滯蒙之質敢不無忘夙夜勉盡疲駑行歸于周又自
安於直道老當益壯誓無於初心仰望闕庭

福州謝到任表

曾子固

列職內朝分符督府荷收憐之俯及省孤陋以何堪中謝
伏念臣寒薄多艱躓愚少與遇繼承於興運未進望於清
光至於九換歲暮常從外徙四臨州部曾未代還茲者備
延閣之美名假東甌之劇郡顧惟同氣亦預改藩但虞人
品之輕莫稱主恩之厚然臣最爲寒族實奉備親臣第既
適於遐陬臣愚固難於遠役理當懇請輒奉冒聞雖未
於矜從亦終寬於僭黷頗識事君之義敢忘奔命之恭

皓首之慈闈抱累年之宿疾衣辭訣泣涕分馳計音信
之往來殆將萬里阻晨昏之定省各在一涯足感動於人
情況親逢於孝治草茅弱質素依及物之仁犬馬微誠終
冀因心之恕再念臣撫臨城邑勞問士民皆狎處於太寧
但遵行於明詔則臣實慙尸於廩食曷補報於寵靈皆出
誤知致斯冒處伏惟 皇帝陛下多能天縱盛德日新躬
神聖之姿而兼容小善履富貴之極而深達下情在於隱
恤之心豈間么微之跡敢不誓殫勤瘁匪懈夙宵懃海徼
之幽荒布德音之寬大承流寵寄方自效於驅馳反哺愚
情冀尚蒙於憫惻仰望旒袞

賀熙寧十年南郊禮畢大赦表

曾子固

伏以人之所歸者莫如德天之所享者在於誠其惟 聖
王克有全美中賀伏惟 皇帝陛下聰明稽古承繼 祖
宗慈惠愛人撫臨邦國有徧覆拜容之大度有防微慎獨
之小心不從遊畋不近聲色無紛華盛麗之好無便僻側
媚之私歲時吉蠲以承七廟左右順適以奉兩宮其功施
於人効見於事則宅仁由義措紳之徒成材於學校超距
踴鞠熊羆之旅養勇於營屯既饗汚邪之收充於倉廩關
通和鈞之利阜於市廛家有豫樂之聲人無愁怨之色協
氣所召休應自殊鈞陳太微星緯咸若崑崙渤澥波濤不
驚近則金石之聲一作鳥獸忻盛遠則干羽之舞蠻夷駘
奔象齒旅於闕廷龍媒納於閑廐是謂六府三事皆可以

誦四海九州罔不率俾蓋巍巍而特起非瑣瑣之能闕前
世議泰山之封謀梁甫之禱者度崇比大疇克登茲 陛
下抑而不圖謙以自牧以謂先后一作王 創業垂統其功莫
得而名 上帝隕祉發祥其德無可以稱思所以報一本
於心故寅畏嚴恭積之有素而齊明薰被進而益虔在於
物者不取其煩盡諸已者必求其寔是以蕭光之列奏於
宗祊柴燎之蒸焜於郊兆幽隱昭答神靈顧懷無疆惟休
方寔昌於萬世不敢專享故敷錫於群元稽參典彝定著
赦令弛張從理同異稱情蠲罪青而棄瑕疵錄勞能而縱
逋負顯晦咸暨洪纖不遺萬國之歡既交於中漠一人之
慶遂及於蚊蠕乎上下之間極乎帝王之盛臣被學最

舊蒙恩深莫待甘泉之祠獨嘆周南之滯第從臣之加
頌未効薄材望屬車之清塵但馳遠思想仰宸宸

賀克伏交趾表

曾子固

螻蟻之微自投必死乾坤之大終許更生惟德及於幽遐
實均慶於中外中賀伏惟 皇帝陛下順稽古憲叙正民
彝鬯敷教於四方壹書文於萬國噴海隅之昧俗肆井底
之狂謀聖恩所懷凶氣自失雕題交趾心服於威靈大賂
南金歲遵於貢職允出止戈之武是稱無敵之仁臣遠守
藩維獲聞捷奏未懷竊抃寔倍常情臣伏恨職守所拘不
獲稱賀闕庭

謝賜唐六典表

曾子固

冒貢微誠敢徼寵 眷獲盈私望特出異恩中謝竊以繼正
觀之造邦維開示之稱治財成唐典本庶務於尚書則象
周官綴舊聞於禮行之當世垂及方來伏遇 皇帝陛下
下接五聖之休期振千齡之絕業號令風采卑秦漢而不
言綱紀文章體唐虞而特起爰因廣覽俯逮遺編俾加鏤
板之傳賜及在廷之士顧最踈之庸下忘輒請之妄逾猥
荷并容預均蕃錫敢不自強衰速采意闕尋竊典故之緒
餘少俾寡陋審官儀之委曲益勵疲駑

謝元豐元年曆日表

曾子固

一遠闕庭十移星曆顧凋零於齒髮無報補於毫分中謝
伏惟 皇帝陛下叙大禹之九疇齊有虞之七政陰陽寒

暑空不若時草木昆虫舉皆遂性循用頒正之典寵詒分
士之官臣幸備守藩預聞告朔去親方遠已經歲月之新
許國雖堅更嘆功名之晚惟體在民之意庶俾及物之仁
仰望冕旒

代皇子延安郡王謝表

曾子固

祇應詔版彌積醜顏蓋崇大於宗藩以盛強於帝室豈伊
獎渥可假幼冲中謝伏念臣器匪夙成材無特異徒歸依
於鞠育每親炙於高明欲善在身忘髡髮之至弱知書可
學最佔畢之相從庶繇受教於章蒙覲獲成能於壯大敢
意攬攸司之密啓循歷世之彝章寵以官儀體均於丞弼
殊其爵列秩右於公侯揣稱何堪踰涯已甚知隆名之難

冒迫大號之既行控避首從震惶滋集此蓋伏遇 皇帝
陛下心潛高厚智極精微推廣愛之仁以隆於父子盡大
公之義以篤於君臣故舊典之當行雖至親而莫間致茲
異數猥及譴能臣敢不仰體聖懷勤遵慈訓省躬擇術庶
不蹈於匪彝臨事知方或可收於近用

代文潞公賀元會表

黃曾直

治曆明時體元居正分陰陽於太族之律會日月於析木
之津萬國皆春六服承德臣中謝恭惟 皇帝陛下緝熙
皇極建用人正合天地於上元垂衣裳於南面首出庶物
茂稱神明之容照臨百官光昭禮樂之會臣欽承頒朔叨
預履端方守鑰於留都阻稱觴於禁殿明明在上遐傾就

日之瞻求未降年仰極後天之祝

代賀生皇子表

黃曾直

景命降休皇文毓秀福慶傳於中禁權鼓溢於普天臣中
賀恭惟 皇帝陛下光宅海隅丕承祖武德親九族孝達
三神后土顧懷皇天眷佑茂本支於百世引壽考於萬年
臣違去清班欽承告語賡歌爪戾蚤知周室之隆參祝禱
祠阻奉漢庭之詔臣限司官鑰不獲扞舞丹墀

代謝賜曆日表

黃曾直

治曆成書步三辰於天載班正有土大一統於王朝詔昔
丁寧圖象昭晰臣 中謝恭惟 皇帝陛下至神不世盛德
無名調玉燭以遂 生運璿璣而成萬化廼明告朔咸俾

在公臣敢不奉之黃堂興丁嗣歲赴吏功於刻漏戒農
之磁基不解恭欽以承特惠

代韓康公大名謝表

黃曾直

遽傳綸命下沛龍光錫之 中殿之清資寄以北門之重鎮
便蕃寵數踴躍哀悰卽以今月某日到任禮上訖憑賴國
靈緝安藩服布宣聖化休息兵民事溢願初警先寵至臣
中謝伏念臣蚤緣儒術 取踐本朝論思稍邇於天光丞弼
遂參於人之乏昨蒙器使外 付服戎智不逮謀功難除過循
名責實公議甚明置散投 附私分如此事出已試衆安可
誣 陛下貸以惟新仁深 公舊南陽在漢之故里許田先
人之弊廬寔為作翰之邦 並荷長民之寄尚憂曠敗終累

保全豈圖誤采朝會再流去。是溘往典帝宮之門。鑰獲瞻魏國之觚稜。許還近班。不以故事承三接之清燕。稱萬年之壽觴。恩榮不替於再三補報。木聞於萬一唯知感涕莫措。覲顏此蓋伏遇 皇帝陛下。王德并容大明。委照眷圖勞效。蔽匿瑕疵。謂臣精神未至。叱昏筋力尚能勉強。故加鞭弭。付以封疆。誓將罄竭愚衷。周旋廟筭。身雖在外。未如江海之遙。知無不為尚異。消塵之益。可酬覆幬。敢愛糜捐。

代呂大忠河北運判官上表

黃魯直

刺舉一道。其心欲愛而公轉。其材欲周而敏。堪寄此任。實難其人。祇荷詔條。誤公使之臣中。謝惟臣淺陋。見事濶踈。在公有夙夜之心。於知初無先後之友。獨持孤拙。仰

累聰明坐尚書之曹。未有以目效。掾將軍之府。幾類於取容籍。在蒐除更蒙識拔。獲對天顏。於咫尺親承聖訓。之丁寧寄重丘山。常恐顛隳于下。恩深雨露。未知報稱。謂何惟是跨河東西。綿歲水旱。民轉移而失職。吏偷脫而行私。期會簿書或文具而實不至。歛心調發或任重而誅不勝。有如民未便安。皆臣職當條按。然出門有萬里之勢。采艾懷三歲之憂。人以為不可盡言。臣何敢以是報國。此蓋伏遇皇帝陛下。剛健中正。欽明文思。一日萬幾。六通四闢。論法於繩墨之外。得人於眉睫之間。昇付百官中外。無間臣敢不識思其位上分霄旰之憂。有所長全效拙勤之報。

代叔父陝西都運謝上表

黃魯直

奉將使符出幹關陝進參必殿之籍增被兼金之章併叨
寵靈惟懼隕越中謝伏念臣非有閎闕起於江湖言無宮
庭行闕防表雖薦蒙於聖使曾未展於寸功熙寧元豐出
入臺省懷於進取氣不以昂衣繡衣貶直指之威冠豸冠
乏觸邪之用二聖臨御八德在官尚容最爾之材來與康
哉之會補宰司之掾計詠莫協於和羹記左史之言文字
不足以華國果速官謗上煩聖聰會當右顧之憂往計西
師之餉雖勤夙夜如負公山此蓋伏遇 皇帝陛下淵默
雷殷文昭武烈親親而日蠻執贄老老而萬物歸心未能
去兵顧憐在邊之守使之足食簡在勸農之司 太皇太
后陛下欽明文思睿智神武大公至正以御九鼎昭德塞

謝禮部侍郎表

范希文

違以臨百官守在四夷聖千不試轉輸萬里民隱是勤致
茲斗筭亦預鞭策敢不精求邊瑣底阜 邦財庶幾柔遠
之功少助在庭之筭

渙渥自天震惶無地循墻弗獲致寇是虞中謝伏念臣布
素寒姿斗筭微器初縻下士之祿忽塵上聖之知歷升近
班嘗預大政深自感激詎為因循仰 祖宗之謀請行故
事懷社稷之計動發危言雖欲必盡其心奚能久安於位
遽彰無狀誠合有誅而聖意始終天慈曠蕩尚寬各於秘
殿復蒙幸於善藩天拙云藏人言用息莫聞課最敢覲龍
光伏蒙 皇帝陛下雷霆震威日月還照未忘圖舊不次

推恩擢登宗伯之曹上應文昌之緯職命如故爵數甚隆
徒執讓以弗諧正服榮而為懼臣敢不夕惕三省寅恭一
心進而盡憂國憂民之心退則處樂天樂道之分上酬聖
遇用竭愚衷

謝致仕表

范景仁

早衰多病得謝歸休有命自天所容如地仰銜恩紀伏竊
兢榮伏念臣本出孤生歷陳廡仕曾無報効虛積歲時仕
宦之年已更一世遭逢之幸實事三朝徒有愚忠以自
信處雖曰乞身而去敢忘憂國之心因叙人言上千天聽
曲蒙寬貸未賜誅夷得於盛明之時以遂閒適之性伏惟
皇帝陛下審持賞罰而一譏於公總秉權剛而不放於下

集群議為耳目以除壅蔽之姦任老成為腹心以養和平
之福齊民富壽措國康寧臣之至情實在於此

謝龍圖閣直學士表

宋敏求

推宸扆之誤恩備禁塗之常從聞命榮抃省躬兢惶伏念
臣性理蠢冥苟致庸近猥緣承學之舊宸沐右文之風
英宗皇帝拔自書林賞於詞掖雖汲黯蚤進謬旅於雋游
而蕭育稀遷自安於拙分一切獎拔星紀僅周固嘗勵翼
其心靖其所守顧命義以弗苟務忱恂而匪他以至涉諫
臣之坡司史氏之筆還儒館而塵嚴正之職分使節而贊
甘泉之儀益忻聖旦之親逢莫匪臺家之茂選而曲綏皇
眷冒進榮階謂臣嘗事先朝典右曹之緡綍俾臣特望廷

閣直西序之圖書撫棄迹以重收帖寵名而差叙帶環申
錫詔檢垂褒此蓋伏遇 皇帝陛下權綱大新恩斷中出
均天地之平施煦及陳矣回日月之餘光豐於都室致茲
竊器亦預清班敢不慎服官箴勤殫忠蘊庶圖來效少報
洪私

進仙源類譜表

畢仲游

天發慶源衍皇支於有求國嚴大典章列祖於無疆今日
載蠲上儀交舉竊以建邦啓土胄本出於神明扶世導民
德已參於化育厚裔苗之憑藉培歷運之靈長炎宋肇興
上通元造昭陵在御專以至仁垂光覃被於雲來流澤涵
濡於億兆厥開真主並緝曠文譜增屬籍之華牒冠史臣

之錄發揮昌緒見小宗大宗之蕃申載宏綱示特書屢書
之重源流宗貴典冊崇成繇 宣祖以來盛星羅於霄極
若明道而後實日靖於洪圖振信厚之風皞皞太和之治
銀潢煥漾玉版闕嚴千八百國之封先乎異姓五三六君
之籍允也同符懿鑠龐洪函生闔譯恭惟 皇帝陛下隆
恩睦族駿惠紹基帝系綿延監枝葉本根之輔皇猷渾灑
思規摹矩矱之遵式是不彛對于華巨臣等參聯庭案親
覩邦祺垂統聿傳陋柳芳永泰之譜休嚴遠繼賡石介慶
曆之詩

安州謝上表

滕甫

屢欲入言固宜竄竄曲蒙天造尚賜保全雖易守符仍叨

善地士民純秀幾同。廣會之流風里俗。驩康正值元豐之樂歲。安閑事簡。尸素爲慙。伏念臣本以愚儒出逢真聖。首蒙國士之遇。最在衆人之先。便欲碎首以酬恩。未知死所。故嘗捐心而自誓。惟有天知。况事任既以徧。更在人情寧不愛惜。豈有固爲緩縱。自取顛濟。惟日月之至明亮。肺肝而必照。矜憐舊物。收置近藩。而朝廷難廢。於公言故。君父特存於大體。稍從遠外。終不棄捐。顧臣何人受恩若此。此蓋伏遇 皇帝陛下神聖徧物。清明在躬。化覃無外。之封疆仁及何知之草木。況臣累更器使。粗效愚衷。眷此遺簪。嘗辱提携之末。譬之行輩。更收踐履之餘。臣敢不祇奉簡書。服勤吏役。雖桑榆之晷。景將逼暮。年而犬馬之微誠。猶

思後效

謝澶州簽判表

程伯淳

論議無補。職業不脩。國有典刑。罪在誅戮。曲蒙弘貸。仰荷洪私。期於糜捐。莫可報謝。臣性資朴魯。學術空虛。志意粗脩。智識無取。陛下講圖大政。博謀群材。過聽侍臣之言。猥加風憲之任。臣既遭遇明聖。亦思誓竭疲駑。惟知直道以事君。豈忍曲學而阿世。屢進闕踈之論。愧非擊搏之才。徒嘗剝瀝肺肝。曾無裨補毫髮。既不能繩愆糾繆。固不願沽直賈名。豈敢冒寵以居。惟是奉身而退。自効之章。繼上闔門之請。竊堅天意未回。憲章尚屈。更奉發中之詔。俾分提憲之權。不惟沮諍論之風。亦懼廢賞刑之實力。形奏述

恭俟誅夷此蓋伏遇 皇帝陛下極天清明普日臨照洞
正邪之心迹辯真偽於幽微察臣忠誠恕臣狂直不忍實
諸重辟投之遠荒解其察視之官處以便安之地生成之
賜義固等於乾坤涵容之恩重益逾於山嶽臣敢不日新
素學力蹈所知秉心不回信道愈篤願徇小夫之志不爲
儒者之羞或能自進於尋常庶可仰酬於萬一

代謝進和御詩獎諭表

強至

參群篇而奏御賡載非工被優詔之發中褒嘉甚渥惕然
拜君父之賜藏以爲子孫之榮伏以書曰帝庸作歌所以
極道明良之意雅云臣能歸美所以上酬福祿之辭惟千
載一時之逢踰三王二帝之際乘太平之多暇講稀闊之

盛游歷寶宇以披 祖宗相受就仰黷聰明幸寵利非事
君之宜必冀寢加恩之命策疲篤雖老臣可疆敢不拜再
任之休訖奉俞音兩詣愚懇此蓋伏遇 皇帝陛下至仁
天冒盛德海涵器使庶工愛徧舊物雖俊傑甚衆並試有
爲之時而痼瘁之餘惜投無用之地敢不勤宣條教兼附
兵民儻溝壑之未填尚乾坤之可報

淮南轉運使謝上表

蘇子容

替畫甘泉久玷三臺之末觀風淮甸驟陞數使之榮朝寄
匪輕地望兼重愧非才選靡定厥官姑謹詔期趣行所部
寵靈所被畏惕非常竊以州郡備官所以分釐於民務朝
廷遣使所以布宣於主恩付一道之事權用六條而舉察

賦輿出內俾以均輸吏治否臧責之薦黜自匪繇更於事
任詎能振肅於治綱若臣者才不足以適時慮不足以經
遠偶緣資級之例得從選用之階始自書坊出分使作俄
從褻服入佐計籌粗收歲月之勞蔑著毫分之效豈謂伏
遇 皇帝陛下察庶工之任使矜人職之良勤拔於省僚
授以利柄矧惟清海之郡寔溢東南之衝昔號輿區今逢
樂歲五家盈疇而遂茂四人勤力以厚生料乎漕運之程
無煩趣辦之急惟當敷宣惠澤通究物情編齊之利病可
更立求其本刑政之重輕或失當適其中止期靖嘉少稱
掄擇若乃事體貌以爲風采盡銖兩以歛民財顧在懦愚
誠多闕略重念上慈天覆聖治日新官無內外之殊事悉

憂勤之繫昨臣受任 陛下臨遣之言曲加於勉諭自省
最爲於踈遠何圖亦記於淵衷豈非以委任之優故特示
柎循之厚雖乾坤厚施非報謝之可言而大馬微生第勤
勞而思奮儻驅馳之有用期終始以無渝

右僕謝待罪表

蘇子容

聖恩深厚仰戴曷勝孤迹兢危彷徨靡所切以宰輔大任
表率百官人望所歸則論議行而必信物情不與則名器
輕而易搖而臣猥以朴愚誤蒙任使上不能謨明國體以
熙庶工下不能甄別人材以協衆望誤朝有遣擢髮寧窮
致招人言上黷天聽名一註於白簡罪當賞於丹書雖二
聖覆之如天未令投迹於四裔而群言謂其失職豈宜包

羞於近班是以屢貢封章冒塵旒纒再紆中札曲諭宸衷
捧詔驚惶重自思省本欲便祈於歸老屬茲方負於罪辜
儻布懇誠懼為僭越在臣進退之分敢計重輕於國廢置
之間實關勸阻伏望 太皇太后陛下 皇帝陛下矜憐
甚鑿本無它腸案舉嚴科亟行幽黜一則安全於介拙尚
保餘生一則馱息於煩言遂清朝路

衡州鹽倉謝上表

劉摯

議今獻言知典刑之無赦原心觀過荷仁聖之有容貸其
餘生處以善地伏念臣稟生報拙遭世盛明學未能窮理
而知幾材不足趣時而適變勝名塗以旅進濫文館之末
游和鈞何功索米逾歲間承人之偶攝掾於中堂旋誤

知使借而負於憲府仍職書林之舊就行御史之中始自愚
臣前無故事方 陛下繼承於五聖而國朝平治者百年
力勤肯穫之田大解不調之瑟蒐拔群材而審以器使變
化百度而曠然日新臣於此時職在言路誓殫忠義敢避
勢權寧以孤睽訐切拂衆而危身不忍從容唱和負恩而
速進狂愚自信裨益無方故宿官之日幾何而瞽言之罪
非一至如均民而弛役因之率戶而出泉雖慮始樂成者
愚人之不知然損下益上者先王之戒輒條十害冀補
萬分議臣見譏以為敗謀而亂化清衷獨見知其有責而
盡言不徇以誅止容其去褫臺閣之二職置瀟湘之一涯
有祿食使之存全有職事何以報效銜恩載幸揣分增憂

此蓋伏遇 皇帝陛下察臣孤忠全國大體不借軌一夫之法庶幾留衆正之門謹當上體恩仁期於必報下堅節義死而不渝

謝青州到任表

劉摯

東方大國莫如鄆青愚臣何人繼命帥守蒞官茲始揣已不遑伏念臣器蘊至疏智靈弗競遭會繼明之始越膺共政之圖三府空逮於六期千慮茂聞於一得雖進退必繇其道常願學乎聖人而功烈如此其卑終難收於士論寬典利於司敗假丘壠之便藩報政稽期實愧三年之魯改符易地猶叨四履之齊惟時東秦號一都會士知禮義境控海山厥民富饒心寇攘之舊習其俗舒緩有平易之餘

風謹於承流可以無事曾是迂愚之品獲塵寄委之優此蓋伏遇 皇帝陛下乾健而粹純豐中而光大沉幾以通變化定鑑以御奸媮人無遐遺材以器使臣敢不振厲衰境激昂至恩簡禮去煩稍究前脩之治推仁宣澤庶求遠俗之安儻集涓微仰酬覆燾

知亳州謝上表

劉攽

齒髮衰暮藩鎮會繁據非所安榮以爲懼昔者聖門高第方六七十則所願爲漢世諸儒至二千石謂之達宦蓋量力審已雖小邦寔曰才難逢辰慕君在有道不容徼幸此所以前哲言志區區其若彼後賢受祿振振焉在茲況如愚臣本緣末學粵塵仕路不棄昌時暨泰分符遂更三郡

曹爲近輔非復自擢之譏曾并泰山仍有變齊之舊至於
渦譙名壤淮楚近郊猶龍之所誕生真聖是焉臨幸大朝
景毫無武湯之上儀迎年執期格帝鴻之純貺民俗旣富
官守維嚴豈伊鷲愚猥叨寄任邈逾涯分高視曩先密焉
自思仍有餘寵獸肇換舊僅踰期月之淹集旆越疆纒倍
宿春之費此蓋伏遇 皇帝陛下聖神妙筭睿智極深廓
久照於容光溥太和於播物流形品彙默化陶鈞致是小
材預膺榮遇謹當布宣詔旨盡瘁官箴爲身愚謀雖冀不
始於知止報國本願尚謝餘生於自然誓殞百身勿渝一
志

知襄州謝上表

劉放

脫身謫籍緹組近藩仰荷恩華不任感懼臣早者濫承人
乏出假使車材非所長力不自料黽勉歲月孤負選掄是
所謂斗筭之才何暇論繩墨之外然惟利術至廣巧者有
餘果聞係踵之後人略取折豪之上第涇以涓濁故常畏
於後生李代桃僵竊自悲於薄命遽辱黜幽之典實由旣
往之愆浮舟江湖託身瘴厲無復自新之望長懷永棄之
憂不謂明詔發中湛恩逮下俾復乘軒之寵仍加分虎之
榮情同更生感惟出涕此蓋伏遇 皇帝陛下離明廣照
乾度并容紹庭之初方勤心於陟降思皇之際亦代置於
緹微以是孱愚得從甄敘謹當勉求民瘼恪佩官箴犬馬
之心以勞力故能有養桑榆之景雖已老尚冀無渝

徐州謝表

蘇子瞻

分符高密已竊名邦改命東徐復塵督府荷恩深厚撫已
兢慙中謝伏念臣奮身農畝託迹書林信道直前曾無坎
井之避立朝寡助誰為先後之容向者屢獻警言仰塵聖
鑒豈有意於為異蓋篤信其所聞顧慚迂闊之言雖多而
無益惟有朴忠之素既久而猶堅遠不忘君未忍改其常
度言之無罪實深恃於至仁知臣者謂臣愛君不知臣者
謂臣多事空懷此意誰復見明伏惟 皇帝陛下日月照
臨乾坤覆幬察孤危之易毀諒拙直之無他安念陋軀畀
付善地民淳訟簡殊無施設之方食足身閑仰愧生成之
賜顧力報之無所懷孤忠而自憐

徐州謝獎諭表

蘇子瞻

奔走服勤人臣之常事褒稱勳學者之至榮自惟何人
乃辱斯語中謝伏念臣學無師法才與世踈經術既以不
深吏事文其所短累忝優寄卒無異稱寬如定遠之言平
平無取拙比道州之政下下宜然乃者河決澶淵毒流淮
泗百堵皆作蓋僚吏之劬勞三板不沉本朝廷之威德而
臣下掠衆美上貪天工獨竊璽書之榮以為私家之寶此
蓋伏遇 皇帝陛下天覆四海子養萬民哀無辜之遭罹
特遣使以存問旣蠲免以賦調又飲食其饑寒所以錄臣
之微勞蓋將責臣之來效臣敢不躬親受築益脩今歲之
防安集流亡盡復平時之業庶輝朽鈍少補絲毫

徐州賀河平表

蘇子瞻

聖謨獨運天眷莫違庶邦子來民罔告病萬杵雷動役不逾時遂消東南莫大之憂然後麥禾可得而食人無後患喜若再生中謝伏以大河爲災歷世所病禹治兗州之野十有三載乃同漢築宣防之宮二十餘年而定未有收任瀾於旣潰復故道於將湮俛仰而成神速若此恭惟皇帝陛下至仁溥施神智無方達四聰以來衆言廣大孝以安宗廟水當潤下河不溢流層歲久之無虞故患生於所忽方其決也本吏失其防而非天意及其復也蓋天助有德而非人功振古所無溥天同慶維豐沛之大澤實汴泗之所鍾伊昔橫流凜孤城之若塊殆茲寧定蔚秋稼以如

云害旣廣則利多憂獨深而喜倍雖官守有限不獲趨外庭以稱觴而民意所同亦能舒下情而作頌

黃州謝表

蘇子瞻

狂愚冒犯固有常刑仁聖矜憐特從輕典赦其必死許以自新祇服訓辭惟知感涕中謝伏念臣早緣科第誤忝縉紳親逢睿哲之興遂有功名之意亦嘗召對便殿考其所學之言試守三州觀其所行之實而臣用意過當日趨於迷賦命衰窮天奪其魄叛逆義理辜負恩私茫如醉夢之中不知言語之出雖至仁屢赦而衆議不容案罪責情固宜伏斧鑕於兩觀推恩屈法猶當禦魑魅於三危豈謂尚玷散員更叨善地投畀麀麀之野保全樛櫟之生臣雖至

愚豈不知幸此蓋伏遇 皇帝陛下德威並用善惡兼容
欲使法行而知恩是用小懲而大誡天地能覆載之而不
能容之於度外父母能生育之而不能出之於死中伏惟
此恩何以爲報惟當蔬食沒齒杜門思愆深悟積年之非
未爲多士之戒貪戀聖世不敢殺身庶幾餘生永爲棄物
若獲盡力鞭箠之下必將捐軀矢石之間指天誓心有死
無易

謝失察妖賊表

蘇子瞻

盜發所臨守臣固當重責罪疑則赦聖主所以廣恩自驚
廢逐之餘猶在愍憐之數中謝公念臣早蒙殊遇擢領大
邦上不能以道化民達忠孝於所部下不能以刑齊物消

姦究於未萌致使妄庸敢圖僭逆原其不職夫豈勝誅況
茲講讀之中重遇雷霆之譴無官可削撫已知危至於捕
斬群盜之功乃是隣近一夫之力靖言其始偶出於臣雖
爲國督姦常懷此志而因人成事豈足言勞勉自列於消
埃庶少寬於斧鉞豈謂蕩然之澤許以勿推收驚魄於散
亡假餘生之畧刻退思所自爲幸何多此蓋伏遇 皇帝
陛下舞虞舜之干示人不殺祝成湯之網與物俱生其間
用刑本不得已稍有可赦無不寬從務在考實而原情何
嘗記過而忘善益悟向時之所坐皆是微臣之自貽感愧
終身論報無地布衣蔬食或未死於饑寒石心木腸誓不
忘於忠義

謝量移汝州表

蘇子瞻

稍從內遷示不終棄罪已甘於萬死恩實出於再生祇服
訓辭惟知感涕中謝伏念臣向者名過其實食浮於人兄
弟並竊於賢科衣冠或以爲盛事旋從冊府出領郡符旣
無片善可紀於絲毫而以重罪當膏於斧鉞雖蒙恩貸有
愧平生隻影自憐命寄江湖之上驚魂未定夢遊縲紲之
中憔悴非人猖狂失志妻孥之所竊笑親友至於絕交疾
病連年人皆相傳爲已死饑寒併日臣亦自厭其餘生豈
謂草芥之賤微尚煩朝廷之紀錄聞其悃悔許以甄收此
蓋伏遇 皇帝陛下湯德日新堯仁天覆建七廟以安祖
考正六官而脩典刑百廢俱興多士爰集彈冠結綬共欣
千載之逢掩面向隅不忍一夫之泣故推滄滴以及焦枯
顧惟效死之無門殺身何益更欲呼天而自刻尚口乃窮
徒有此心期於異日

到常州謝表

蘇子瞻

積釁難磨未經洗滌至仁易感許即便安祇荷寵靈惟知
感涕中謝伏念臣所犯罪戾本合誅夷向非 先帝之至
明豈有餘生於今日啣恩未報有志不從已分沒身寄殘
骸於魑魅敢期擇地收暮景於桑榆此蓋伏遇 皇帝陛
下仁孝生知聰明天縱寅奉上帝之眷命述脩累聖之成
謀念此管蒯之微庶幾簪履之舊俾安田畝稍出縲囚飽
食無思但日陶於新化杜門自省當益念於往愆

登州謝表

蘇子瞻

登雖小郡地號極邊自驚縲紲之餘忽有民社之寄拜恩不次隕涕何言中謝臣聞臣不密則失身而臣無周身之智人不可以無學而臣有不學之愚積此兩愆本當萬死坐受六年之謫甘如五鼎之珍擊鼓登聞止求自便買田陽羨誓畢比生豈期枯朽之中有此遭逢之異收招魂魄復為平人洗濯瑕疵盡還舊物此蓋伏遇 皇帝陛下內行曾閔之孝外發禹湯之仁日將旦而四海明天方春而萬物作於其黨而觀過謂臣或出於愛君就所短而求長知臣稍習於治郡致茲異寵驟及非才恭惟 先帝全臣於衆怒必死之中 陛下起臣於散官永棄之地沒身難

報碎首為期

謝中書舍人表

蘇子瞻

右史記言已塵高選西園視草復玷近班皆儒百之至榮豈平生之敢望中謝竊以詞命之職古今所難非獨取之於文蓋將試之以事至於機務亦或與聞雖四戶擅權非當時之公議而五七判事亦前代之美談及夫三字之除乃是一切之政但謂內朝之法從安知宰相之屬官既任止於訓辭故權移於胥史恬不知怪習為故常 先皇帝道冠百王法垂萬世建六官而脩故事闢三省以待異人典章一新名實皆正遂申明於四禁俾分領於六曹遠則追直閣之司近則通檢正之任雖未聞政而聞事蓋須有

德而有言如臣之愚無一而可草創潤色既非鄭國之材
除書德音又乏唐人之譽忽當此選莫測其由此蓋伏遇
皇帝陛下將聖與仁能哲而惠雖在三年不言之際已有
十日並照之光而臣日侍邇英親聞訪道仰天威之甚近
知聖覽之難逃謂臣嘗受先朝之知實無左右之助棄瑕
往昔責效將來臣敢不益勵素心無忘舊學上體周公煩
悉之誥助成漢家深厚之文苟無曠官其敢言報

又表

蘇子瞻

聖神獨斷出成命於省中衰病增光溢虛名於朝右訓詞
之重士論所榮中謝臣聞有言逆心此古人所以顛沛積
毀消骨非聖主莫能保全臣本受知於裕陵亦嘗見待以

國士嘉其好直許以能文雖竄謫流離之餘決無可用而
哀憐收拾之意終不少衰抱弓劍以長號分簪履之永棄
豈期晚遇又過初心矧外制之深嚴極西垣之清要在唐
之盛以馬周岑文本為得人近世所傳有楊億歐陽脩之
故事不試而用於今幾人遂超同列之先遠繼前脩之末
夫何頑鈍有此遭逢此蓋伏遇 太皇太后陛下憂國忘
身愛民如子憂深故任其事者重愛極故為之慮也長敷
求哲人以遺聖嗣所以兼收而並用庶幾有得於其間臣
敢不盡其所能期於無愧始終自誓故常以道而事君夷
險不同則必見危而授命

謝宣召入院表

蘇子瞻

詔語奉溫再命而僂使華天降一節以趨在故事以嘗聞
豈平生之敢望省循非稱愧汗交深竊以視草之官自唐
爲盛雖職親事祕號爲北門學士之榮而祿薄地寒至有
京兆掾曹之請豈如聖代一振儒風非徒好爵之糜兼享
大烹之養玉堂賜篆仰淳化之彌文寶帶重金佩元豐之
新渥旣厚其禮愈難其人而臣以空踈冗散之材衰病流
離之後生還萬里坐閱三遷不緣左右之容躡處賢豪之
上此蓋伏遇 皇帝陛下生資文武天祚聖神雖亮陰不
言尚隱高宗之德而小慈求助已啓成王之心首擇輔臣
次求法從知人材之難得采虛名而用臣敢不益勵初心
力圖後效身不逮古雖慙內相之名志嘗在民庶免私人

之誦

謝賜對衣金帶馬表

蘇子瞻

被三品之服章君子所以昭令德分六閑之駟駿朝廷所
以旌有功顧惟何人亦與茲寵拜恩俯僂流汗交并中謝
伏念臣人微地寒性迂才短襲布帛而自薦偶忝縉紳駕
款段以言歸終安吠畝豈謂便蕃之錫萃於衰病之軀此
蓋伏遇 皇帝陛下總覽衆工財成大化至誠樂與有緇
衣之好賢後民用章無白駒於虛谷不遺寒陋亦被光華
攬佩以思遂識斷金之義舉鞭自誓敢忘希驥之心

又表

蘇子瞻

命服出笥策動縉紳左驂在庭光生徒馭德不稱物愧無

所容中謝伏念臣衰朽無功蠢愚不學已分鵜梁之刺敢
逃負乘之譏再惟此恩何自而至此蓋伏遇 太皇太后
陛下至仁廣運盛德兼容躬周公之勤勞而逸於委任寶
者氏之慈儉而侈於禮賢致此光榮下及微陋慨然攬轡
敢有意於澄清東以立朝尚可言於賓客

又表

蘇子瞻

出笥之珍已華朽質解駮之賜益耀衆觀顧惟何人亦被
茲寵中謝伏念臣少而拙訥老益踈愚山野之姿非文繡
之所及疲駑之質雖鞭策以何加方祈冗散之安更忝便
蕃之錫此蓋伏遇 皇帝陛下緝熙儒術羅網人才不愛
車服寵數之章使爲吏民瞻望之美據鞍有愧束衽知榮

敢不奉以牧民永思去害之指施之治邑庶無學製之傷

又表

蘇子瞻

命服斯皇詩詠周文之德康侯用錫易稱王母之仁惠澤
所加臣工知勸中謝伏念臣資材朽鈍學術空踈矧茲衰
病之餘豈復光華之美荷寵章之蕃庶人以為榮顧形影
之支離臣惟自愧此蓋伏遇 太皇太后陛下知人堯哲
徧物舜仁時遣拾遺補過之臣出爲承流宣化之任子衣
安吉不待請而有之我馬虺隤蓋知榮而賜者敢不勉思
忠蓋務報恩勲未爲廐庫之珍莫非民力無忘獄市之寄
以副上心

又表

蘇子瞻

錫之上駟敢忘致遠之勞佩以良金無復忘腰之適執鞭
請事顧影知慙恭惟 皇帝陛下禹儉中脩堯文外煥長
轡以御率皆四牡之良所寶惟賢豈徒三品之貴出捐車
服收輯事功而臣衰不待年寵常過分枯羸之質匪伊垂
之而帶有餘歛退之心非敢後也而馬不進徒堅晚節難
報深恩

又表

蘇子瞻

出筭之珍以旌有德在垠之駟豈及無功而臣首尾四年
叨塵三錫省躬內灼服寵汗流恭惟 大皇太后陛下慈
儉自居龍光四達德被海宇豈惟一襲之衣恩結華夷何
止十圍之帶群賢在御六轡自調而臣頃以衰羸止求安

便奉宣德意庶幾五袴之誼收歛壯心無復千里之志更
期力報有愧空言

謝除侍讀表

蘇子瞻

北門視草已叨儒者之極榮西學上賢復玷侍臣之高選
省循非稱愧汗交懷中謝竊惟講讀之臣止以言語為職

考功課吏無殿最之可書陳善閉邪有膏澤之潛潤豈臣

愚陋亦所克堪此蓋伏遇 太皇太后陛下憂思深長德

蒙久大受 先帝投艱之托為神孫經遠之謀故選左右

前後之人罔非吉士使知興亡治亂之效莫若多聞謂臣

雖無大過人之才知臣粗有不欺君之實故使朝夕與於

討論奉永日之清閑未知所報畢微生於盡瘁終致此心

賀明堂赦書表

蘇子瞻

宗祀禮成脩累朝之盛典端門肆青荅萬宇之歡心凡有
識知舉增忭躍中賀竊謂祖宗恩信之所被譬如天地寒
暑之不差將推作解之仁必在當郊之歲恭惟 皇帝陛
下憲章六聖左右三靈上帝眷而風雨時壬人去而蠻夷
服講明大禮對越昊天懷柔百神嚮用五福大河脩復奏
軌道於東流藩邸顧懷錫鴻名於西府臣備員法從待罪
守臣想聞路寢之鼓鍾曾叨奉引嘉與海宇之草木同被
恩私

謝賜御書詩表

蘇子瞻

玉筆上尊霽若雲天之澤寶章宸翰煥乎奎壁之文喜溢
心顏光生懷袖伏念臣猥緣末技獲玷清流早歲數竒已
考江河之上餘生何幸得依日月之光入侍燕閑與聞講
學卒桓榮之業因人而成登劉涓之床則臣豈敢夫何珎
賜亦及微軀此蓋伏遇 皇帝陛下道本生知才惟天縱
文不數於游夏書已逼於鍾王心慕手追陋文皇之曲學
筆縱字大笑宋武之末工知臣遭遇之難欲以顯榮其老
鏤之金石庶傳玩於人人付與子孫俾輸忠於世世

謝除龍圖閣學士表

蘇子瞻

中禁寶儲上應奎壁之象先朝謨訓遠同河洛之符隸職
其間省躬非據中謝伏念臣學非有得愚至不移雖叨過
實之名卒無適用之器少時妄意蓋嘗有志於事功晚歲

積憂但欲歸安於田畝屬聖神之履運荷識拔之非常猶
冀桑榆之收遽迫犬馬之疾力求閑散庶免顛躋豈謂
皇帝陛下聖度包荒天慈委照察其才有所短不欲疆置
之禁嚴知其進不由人故特保全其終始遂加此職以資
其行臣敢不仰緣未光益勵素守往何之而不可中無愧
之爲安但未死亡必期報塞

名家表選卷之四

